

BOSNA I HERCEGOVINA
Konkurencijsko vijeće



BOSNA I HERCEGOVINA
Konkurencijski savjet

R J E Š E N J E

po Prijavi namjere koncentracije privrednog subjekta "Naftna industrija Srbije" a.d. Novi Sad, Republika Srbija, privrednog subjekta Benzinska stanica Trn 1, Trn, Laktaši, privrednog subjekta Benzinska stanica Trn 2, Trn, Laktaši

**Sarajevo,
oktobar 2011. godine**



Broj: 03-26-1-16-10-II/11
Sarajevo: 12.10.2011. godine

Na osnovu člana 42. stav (1) tačka d), a u vezi sa članovima 12., 14., 16., i 18. Zakona o konkurenciji ("Službeni glasnik BiH", br. 48/05, 76/07 i 80/09), rješavajući po Prijavi koncentracije privrednog subjekta Društvo za istraživanje, proizvodnju, preradu, distribuciju i promet nafte i naftnih derivata i proizvodnju prirodnog gasa "Naftna industrija Srbije" a.d. Narodnog Fronta 12, Novi Sad, Republika Srbija, i privrednog subjekta Benzinska stanica Trn 1, Trn, 78250 Laktaši, vlasništvo privrednog subjekta "SINECOOP" d.o.o. za poljoprivrednu proizvodnju, preradu i trgovinu Trn-Laktaši, Prijedorska bb, Trn, 78250 Laktaši i privrednog subjekta Benzinska stanica Trn 2, Trn, 78250 Laktaši, vlasništvo fizičkog lica Roguljić Bojana, Trn, 78250 Laktaši, zaprimljenoj dana 27.07.2011. godine pod brojem: 03-26-1-16-II/11, Konkurencijsko vijeće na 19. (devetnaestoj) sjednici održanoj dana 12.10.2011. godine, donijelo je

R J E Š E N J E

1. Ocjenjuje se dopuštenom koncentracija koja će nastati na tržištu maloprodaje naftnih derivata u Republici Srpskoj sticanjem kontrole kupovinom većinskog udjela osnovnog kapitala privrednog subjekta Društvo za istraživanje, proizvodnju, preradu, distribuciju i promet nafte i naftnih derivata i proizvodnju prirodnog gasa "Naftna industrija Srbije" a.d. Narodnog Fronta 12, Novi Sad, Republika Srbija u privrednom subjektu Benzinska stanica Trn 2, Trn, 78250 Laktaši.
2. Ovo Rješenje je konačno i upisuje se u registar koncentracija.
3. Ovo Rješenje bit će objavljeno u "Službenom glasniku BiH", službenim glasilima entiteta i Brčko distrikta Bosne i Hercegovine.

O B R A Z L O Ž E N J E

Konkurencijsko vijeće je zaprimilo, dana 27.07.2011. godine pod brojem: 03-26-1-16-II/11, Prijavu koncentracije (u daljem tekstu: Prijava) podnesenu od privrednog subjekta Društvo za istraživanje, proizvodnju, preradu, distribuciju i promet nafte i naftnih derivata i proizvodnju prirodnog gasa "Naftna industrija Srbije" a.d. Narodnog Fronta 12, Novi Sad, Republika Srbija (u daljem tekstu: "NIS" ili Podnosilac prijave), kojom privredni subjekt "NIS" namjerava kupiti 100,0% udjela u osnovnom kapitalu privrednog subjekta Benzinska stanica Trn 1, Trn, 78250 Laktaši (u daljem tekstu: BS Trn 1), vlasništvo privrednog subjekta "SINECOOP" d.o.o. za poljoprivrednu proizvodnju, preradu i trgovinu Trn-Laktaši, Prijedorska bb, Trn, 78250 Laktaši, i privrednom subjektu Benzinska stanica Trn 2, Trn, 78250 Laktaši (u daljem tekstu: BS Trn 1), u vlasništvu fizičkog lica Roguljić Bojana, Trn, 78250 Laktaši.

Konkurencijsko vijeće je uvidom u dostavljenu dokumentaciju, u skladu sa članom 30. Zakona o konkurenciji (u daljem tekstu: Zakon) i čl. 9. i 11. Odluke o načinu podnošenja prijave i kriterijima za ocjenu koncentracija privrednih subjekta ("Službeni glasnik BiH", broj 34/10),

utvrdilo da Prijava nije potpuna te je zatražilo dopunu iste, u skladu sa članom 31. Zakona, aktom broj: 03-26-1-16-3-II/11 od dana 09.08.2011. godine.

Podnosilac prijave je traženu dokumentaciju dostavio, podneskom zaprimljenim dana 22.08.2011. godine pod brojem: 03-26-1-16-4-II/11.

Prijemom tražene dokumentacije Konkurencijsko vijeće je utvrdilo Prijavu kompletnom i izdalo Potvrdu o prijemu kompletne i uredne Prijave, u skladu sa članom 30. stav (3) Zakona, dana 22.09.2011. godine pod brojem: 03-26-1-16-5-II/11.

Podnosilac prijave je naveo, u smislu člana 30. stav (2) Zakona, da nije podnio zahtjev za ocjenu koncentracije ovlaštenim tijelima za konkurenciju izvan teritorije Bosne i Hercegovine.

Konkurencijsko vijeće je u skladu sa članom 16. stav (4) Zakona, izdalo Obavijest o dostavljenoj Prijavi u dnevnoj štampi Bosne i Hercegovine, broj: 03-26-1-16-7-II/11 od dana 26.09.2011. godine, u kojoj je objavilo podatke o koncentraciji, te pozvalo sve direktno zainteresovane strane na dostavljanje pisanih komentara vezanih za provođenje iste. Na predmetnu Obavijest nisu dostavljeni komentari zainteresovanih strana.

U postupku ocjene Prijave Konkurencijsko vijeće je utvrdilo slijedeće činjenice:

Prijava koncentracije je podnesena u propisanom roku, u smislu člana 16. stav (1) Zakona.

1. Učesnici koncentracije

Učesnici koncentracije su privredni subjekt Društvo za istraživanje, proizvodnju, preradu, distribuciju i promet nafte i naftnih derivata i proizvodnju prirodnog gasa "Naftna industrija Srbije" a.d. Narodnog Fronta 12, Novi Sad, Republika Srbija, privredni subjekt Benzinska stanica Trn 2, Trn, 78250 Laktaši i privredni subjekt Benzinska stanica Trn 1, Trn, 78250 Laktaši.

1.1. Privredni subjekt "NIS"

Društvo za istraživanje, proizvodnju, preradu, distribuciju i promet nafte i naftnih derivata i proizvodnju prirodnog gasa "Naftna industrija Srbije" a.d. Narodnog Fronta 12, Novi Sad, Republika Srbija (skraćeni naziv: "NIS" a.d. Novi Sad), osnovano je dana 01.10.2005. godine i registrovano kod Agencije za privredne registre Republike Srbije, matični broj: 20084693.

Pretežne registrovane djelatnosti privrednog subjekta "NIS" su istraživanje, proizvodnja i prerada nafte, naftnih derivata i gasa, distribucija i promet nafte, naftnih derivata i gasa i spoljnotrgovinska djelatnost.

Poslovne jedinice privrednog subjekta "NIS" na dan 12.07.2011. godine, su:

- Ogranak NIS-NAFTAGAS Novi Sad, Republika Srbija, (uključuje i rafineriju prirodnog gasa u Elemiru) obavlja djelatnost istraživanja i proizvodnje nafte i gasa uključujući i naftne servise koji pružaju podršku realizaciji proizvodnih aktivnosti;
- Ogranak NIS-PETROL Novi Sad, Republika Srbija, (uključuje rafinerije u Pančevu i Novom Sadu) obavlja djelatnost prerade i prodaje nafte i naftnih derivata u preko 476 aktivnih benzinskih stanica, 8 velikih instalacija i 31 aktivnog stovarišta u Republici Srbiji;

- Ogranak NIS-TNG Elemir, Republika Srbija, obavlja djelatnost trgovine na veliko čvrstim, tečnim i gasovitim gorivima i sličnim proizvodima;
- Ogranak NIS a.d. - NIS – Naftagas u Turkmenistanu, vrši bušotinske radove na nalazištima nafte i gasa, pruža laboratorijske usluge servisiranjem naftnih i gasnih objekata i bavi se istraživačkim radom;
- Predstavništvo NIS a.d. Novi Sad, Moskva Ruska Federacija, bavi se istraživanjem, proizvodnjom, preradom i distribucijom sirove nafte i prirodnog gasa i proizvoda njihove prerade;
- Predstavništvo NIS a.d. Novi Sad - NIS – NAFTAGAS Luanda, Angola, bavi se istraživanjem, proizvodnjom i slično;
- Ogranak Zatvorenog akcionarskog društva za istraživanje, proizvodnju, preradu, distribuciju i promet nafte i naftnih derivata i istraživanje i proizvodnju prirodnog gasa NIS a.d. Novi Sad u Nojabrsku, Ruska Federacija, osnovano radi zaštite i zastupanja interesa društva;
- Predstavništvo NIS a.d. Novi Sad u Briselu, Kraljevina Belgija.

Vlasnička struktura privrednog subjekta "NIS" na dan 06.07.2011.godine:

Tabela 1.

R.b.	Akcionari NIS-a	Udio akcija sa pravom glasa (%)
1.	GASPROM NEFT	56,15458
2.	REPUBLIKA SRBIJA	29,87567
3.	ERSTE BANK CUSTODY	0,42797
4.	ZAGREBAČKA BANKA D.D.	0,36203
5.	THE ROJAL BANK OF SCOTLAND	0,12553
6.	CITYGROUP GLOBAL MARKET LTD	0,09368
7.	JULIUS BAER MULTIPARTNER-BALKA	0,06009
8.	HYPO KASTODI 4	0,04631
9.	UNICREDIT BANK AUSTRIA AG	0,04615
10.	EAST CAPITAL ASSET MANAG.	0,04069
11.	Ostali akcionari	12,76730
UKUPNO		100,0

Izvor: Podaci iz Prijave

Iz navedenih podataka (Tabela 1.) utvrđeno je da je većinski vlasnik privrednog subjekta "NIS" privredni subjekt GASPROM NEFT, Sankt-Peterburg, Ruska Federacija.

Privredni subjekt "NIS" ne djeluje na tržištu maloprodaje naftnih derivata u Bosni i Hercegovini.

U Bosni i Hercegovini privredni subjekt "NIS" djeluje preko povezanog privrednog subjekta "Jadran Naftagas" d.o.o. Banja Luka (66% vlasničkih udjela u osnovnom kapitalu) sa pretežnom registrovanom djelatnosti istraživanja i proizvodnje nafte i gasa.

1.2. Privredni subjekt BS Trn 1

Privredni subjekt Benzinska stanica Trn 1 u 100,0% je u vlasništvu privrednog subjekta "SINECOOP" d.o.o. za poljoprivrednu proizvodnju, preradu i trgovinu Trn-Laktaši, Prijedorska bb, Trn, 78250 Laktaši, upisanog u Okružnom privrednom sudu u Banjoj Luci pod brojem MBS:

1-1781-00, koji je u vlasništvu fizičkih lica Kovačević Mirela i Roguljić Bojan po 50,0% vlasničkih udjela.

Privredni subjekt BS Trn 1 je u zakupu privrednog subjekta "ANECOP" d.o.o za trgovinu i posredovanje Laktaši, od dana 20.01.2011. godine.

1.3. Privredni subjekt BS Trn 2

Privredni subjekt Benzinska stanica Trn 2 u 100,0% je vlasništvu fizičkog lica Roguljić Bojana (..)*¹, Trn, 78250 Laktaši.

Privredni subjekt BS Trn 2 je u zakupu privrednog subjekta ""ANECOP" d.o.o za trgovinu i posredovanje Laktaši, od dana 20.01.2011. godine.

2. Obaveza prijave koncentracije

Obaveza prijave koncentracije privrednih subjekata, u smislu odredbe člana 14. stav (1) pod b) Zakona, postoji ako ukupni godišnji prihodi svakog od najmanje dva privredna subjekta učesnika koncentracije ostvaren prodajom roba i /ili usluga na tržištu Bosne i Hercegovine iznosi najmanje 8.000.000,00 KM po završnom računu u godini koja je predhodila koncentraciji, ili ako je njihovo zajednički udio na relevantnom tržištu veći od 40%.

Ukupni prihodi učesnika koncentracije na dan 31.12.2010. godine:

Tabela 2.

	NIS	BS Trn 1	BS Trn 2
Bosna i Hercegovina	(..)*	(..)*	(..)*
Svijet	(..)*	-	-

Izvor: Podaci iz Prijave

Konkurencijsko vijeće je utvrdilo (Tabela 2) da su privredni subjekt "NIS" i privredni subjekt BS Trn 2 na tržištu Bosne i Hercegovine u 2010. godini ostvarili ukupan prihod preko 8 mil. KM, te podliježu obavezi prijave koncentracije, dok privredni subjekt BS Trn 1 nije ostvario ukupan prihod veći od 8 mil. KM te ne podliježe obavezi prijave koncentracije.

3. Pravni okvir ocjene koncentracije

Konkurencijsko vijeće je u provođenju postupka ocjene predmetne koncentracije primijenilo odredbe Zakona, Odluke o načinu podnošenja prijave i kriterijima za ocjenu koncentracija privrednih subjekata i Odluke o utvrđivanju relevantnog tržišta ("Službeni glasnik BiH", br. 18/06 i 34/10).

4. Pravni osnov i oblik koncentracije

U Prijavi je dostavljen kao pravni osnov koncentracije Ugovor o kupoprodaji BS Trn 2 od dana 14.07.2011. godine, između kupca privrednog subjekta "NIS" i prodavca fizičkog lica Roguljić Bojana, notarski obrađen dana 14.07.2011. godine OPU broj: 1231/2011, od strane istog notara.

¹ Podaci se smatraju poslovnom tajnom u smislu člana 38. Zakona o konkurenciji

Pravni oblik koncentracije u skladu sa članom 12. stav (1) tačka b) pod 1) Zakona je sticanje kontrole ili dominantnog uticaja jednog privrednog subjekta ("NIS") nad drugim privrednim subjektom (BS Trn 2), kupovinom 100,0% udjela u osnovnom kapitalu.

5. Relevantno tržište

Relevantno tržište, u smislu člana 3. Zakona, te člana 4. i 5. Odluke o utvrđivanju relevantnog tržišta, čini tržište određenih proizvoda i/ili usluga koji su predmet obavljanja djelatnosti na određenom geografskom području.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge koje potrošači smatraju međusobno zamjenjivim s obzirom na njihove bitne karakteristike, kvalitet, namjenu, cijenu ili način upotrebe. Prema članu 5. Odluke o utvrđivanju relevantnog tržišta, relevantno tržište u geografskom smislu obuhvata cijelu ili dio teritorije Bosne i Hercegovine, na kojoj su tržišni konkurenti aktivni u prodaji i/ili kupovini relevantnog proizvoda pod jednakim ili dovoljno ujednačenim uslovima koji to tržište bitno razlikuju od uslova tržišne konkurencije na susjednim geografskim tržištima.

Relevantno tržište je određeno prema predmetu poslovanja i teritoriji na kojoj djeluju učesnici u koncentraciji nad kojim se stiče kontrola.

Na osnovu navedenoga, kao relevantno tržište proizvoda određeno je tržište maloprodaje naftnih derivata, dok je za relevantno tržište u geografskom smislu određena teritorija Republike Srpske.

6. Analiza relevantnog tržišta

Tržišni udjeli učesnika koncentracije i njihovih konkurenata, određeni prema broju benzinskih stanica na relevantnom tržištu Republike Srpske:

Tabela 3.

R.b.	Naziv privrednog subjekta	Broj benzinskih stanica u RS	Tržišni udio %
1.	Nestro Petrol	79	20,31
2.	Parma Trend	22	5,66
3.	Krajinapetrol	14	3,60
4.	Petrol BH Oil Company	10	2,57
5.	BS Trn 2	1	0,39
6.	Ostali	262	67,35
	UKUPNO	389	100,00

Izvor: Podaci iz Prijave i podaci Konkurencijskog vijeća

Prema podacima (Tabele 3.) privredni subjekt BS Trn 2 ima tržišni udio od 0,39%, dok privredni subjekt "NIS" nije imao tržišnog udjela s obzirom da nije obavljao djelatnost maloprodaje naftnih derivata na relevantnom tržištu.

Nakon provođenja predmetne koncentracije, privredni subjekt "NIS" će na relevantnom tržištu imati ukupni tržišni udio od 0,39%.

7. Ocjena predmetne koncentracije

Konkurencijsko vijeće je analizom relevantnih podataka, u smislu člana 17. Zakona, ocijenilo da provođenjem namjeravane koncentracije neće doći do narušavanja tržišne konkurencije, odnosno stvaranja ili jačanja dominantne pozicije učesnika koncentracije.

Konkurencijsko vijeće je prilikom donošenja konačne odluke uzelo u obzir da privredni subjekt "NIS" do sada nije učestvovao na relevantnom tržištu maloprodaje naftnih derivata Republike Srpske, te da će njegov tržišni udio nakon provođenja predmetne koncentracije biti neznatan.

Konkurencijsko vijeće je u smislu člana 18. stav (2) tačka a) Zakona donijelo odluku kao u dispozitivu ovog Rješenja.

8. Administrativna taksa

Podnosilac Prijave je u skladu sa članom 2. tarifni broj 107. stav (1) tačka d) pod 1) Odluke o administrativnim taksama u vezi s procesnim radnjama pred Konkurencijskim vijećem ("Službeni glasnik BiH", br. 30/06 i 18/11), dužan platiti administrativnu taksu na ovo Rješenje u iznosu od 2.500,00 KM, u korist Budžeta institucija Bosne i Hercegovine.

9. Pouka o pravnom lijeku

Protiv ovog Rješenja nije dozvoljena žalba.

Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja, odnosno od dana njegovog objavljivanja.

Predsjednik

Ibrica Lakišić